


0680CH02



मावफारि 1: मिथिंगायाव दावबायनाय

बिफां, लाइफां, हाजो, दैसा, लैथो आरो बालाफोरजों नोंथाडा बेंखन जायोब्ला माबोरै मोन्दाडो? नैनिफ्राय थाम मिनिटसिम साननानै नायदि नोंथाडा सोरगिदिं मिथिंगाजों बेंखनजानाय। नोंथाडा मा मा नुदों? जेब्ला बेफोर गुबुन गुबुन जिरादफोरखौ दांनानै नायो अब्ला नोंथाडा माबोरै मोन्दाडो? नोंथाडा गावनि आथिं सिडाव मा मोन्दादों? नोंथाडा बेसेबां गोजानसिम नायहरनो हादों? माबाफोर सोलिगासिनो दं नामा? नोंथाडा मा खोनादों?

साब्रैनिफ्राय साबा फरायसाफोरनि फिसा हानजा बानाय आरो गावजों गावनि गेजेराव सानबोलावरिफोरखौ फोरमायलाय।

गावनि सावगारि आखिग्रा बिजाब आरो गंसे पेन्सिल ला आरो सोरगिदिंखौ संदाननो थाखाय बायजोआव दावबाय।

1. अखाडाव नाय आरो बेनि फैलावथिखौ मोन्दां। नोंथाडा नुनाय गाबफोर एबा जोमैनि महरखौ लिरनानै दोन।
2. हायाव नाय। हानि गाब, गुबुन-गुबुन रोखोमनि अन्थाइफोर, अन्थाइ सेरेब आरो फिसा अन्थाइफोरखौ नोजोर हो। दां आरो बेफोरनि दाथायखौ मोन्दां। मा बेफोर स्लिम स्लिम, अग्रा अग्रि, हारां हाथां, दागो गोनां ना माबा गुबुन दाथायनि?
3. मोनसे जायगा नागिर जेराव माखासे बिफां-लाइफांफोर दं। लाइफांखौ लासैयै दां आरो बेनि

बिलाइफोर, देन्थाफोर, बिगुरफोर, बिबारफोर, बेगर बिखबफोर आरो नोंथाडा नुनाय गुबुन जायखिजाया मुवानि दाथायखौ मोन्दां। बैफोर दाथायफोरखौ आखिनो नाजा एबा सोदोबफोरनि गेजेरजों लिर।

4. बिलाइफोरनि महरफोर आरो नोंथाडा नुनाय सारि आरो दाथायफोरखौ खाथिनिफ्राय नोजोर हो। गुबुन गुबुन महर, सारि आरो दाथायफोर थानाय गांथाम बिलाइफोरनि सावगारि आखि। बेफोरनि गाबफोरनि सोमोन्दै लिर।
5. जायखिजाया जुनार, दाव एबा एम्फौ-एनलाफोरखौ खाथिनिफ्राय नोजोर हो। बिसोर मा जिरायनानै, उन्दुनानै, गसंनानै दं ना गिदिंथिंगासिनो? बिसोरनि महरखौ आखिनो नाजा।

मोनसे हानजायाव ज' जा, आरो गावनि आखिनाय सावगारिफोर आरो नोजोरफोरखौ फोरमायलाय।

सोलिबाय थानाय: मोनसे नुथायारि लाइसि जागायजेन आरो नोंथाडा सानफ्रोमबो नुनो मोननाय गुबुन-गुबुन जिरादफोरनि सावगारि आखि।

मावफारि 2: फोथार दावबायनाय

गंसे रैखाथुमसालि, आरिमुगिरिफोरनि आरिमुसालि एबा जायखिजाया जायगायाव थां जेराव आरिमुगिरिफोरा खामानि मावो। बेफोर सोंलुफोरनि सायाव बिथा खालामनानै गावनि मोन्दांथिफोरखौ लिर:

1. नोंथाडा मा रोखोमनि नुथायारि आरिमुखौ नुयो?
2. आरिमुवारि खामानियाव बाहाय जानाय बेसादफोरा मा मा?
3. आरिमुगिरिफोरा सोर? बिसोर मा मा आइजें-आइला आरो आदबफोरखौ बाहायो?
4. आरिमुवारि खामानि एबा दिन्धिफुंनायनि थाखाय जायगाखौ माबोरै साजायनाय जायो?
5. नोंथाडा मा मा गोदान सान्दांथि एबा मोन्दांथिफोर मोनदों?

गावनि रोंमोन्दांथिजोंनो आखि एबा नोंथाडा बैफोर सावगारिफोरखौ हेफाजाब महरै लानो हागोन।





नुथायार आरमुफोर

मावफारि 3: मिथिंगायारि गाब बानाय

नोंथाडा माब्लाबा सानफेरदों ना गाबफोरा बबेनिफ्राय फैयो? बेफोरखौ माबोरै बानायनाय जायो? सिगांनो बानायखानाय बाक्सुफोरनि गाबगोनां पेन्सिल, क्रेय'न आरो गाबफोर फुननायनि सिगां आरिमुगिरिफोरा मा बाहायदोंमोन?

जानाय आदारनि सोमोन्दै साननानै नाय। जेब्ला नवाव दालि संनाय जायो, अब्ला बेखौ बांसिन गोमो खालामनो थाखाय मा दाजाबदेरनाय जायो?

हालदै! बेखौ नोंथानि रावाव न'आव मा बुडो?

दानिया, गुबुन जामुफोरनि बाथ्रा सान जायखौ सिगाडाव मोनजाखांबाय। जुदि बेफोर बोहैग्लायोब्ला बेफोरनि माखासे गाबा नोंथानि आसिफोर, सालाय आरो जि-जोमफोरखौबो दागो खालामो।

बेबायदिनो, बिबारफोरखौबो गाब दिहुननो थाखाय बाहायनो हायो।


बिफां-लाइफांफोरनि अनगायैबो हा, अन्थाइ आरो खनियारि दोनथुमनायनिफ्रायबो गाब बानायनो हायो। बेफोर बिखान्थिफोरखौ सुबुंफोरा बायदि रोखोमनि आरिमुवारि थांखिफोरनि थाखाय गाबफोर थियारि खालामनो बाहायदोंमोन।

नोंथानि जामुडाव माखासे फिथाइ-सामथाइ, मैगं-थाइगं, बिलाइ आरो रोदाफोरनि मोनसे फारिलाइ लिर, जायफोरखौ सेबोब्ला एबा सडोब्ला गाब ओंखारो।

1. _____
2. _____
3. _____
4. _____
5. _____



फै जों जोंनि मिथिंगायारि गाबफोरखौ बानायनो सोलोंनि




थाखो 1: हा, खनियारि बेसाद, मैगं-थाइगं, बिबार, फिथाइ-सामथाइ, रोदा, हांगार बायदि बायदिनिफ्राय सोदाडै मुवानि फुखा (गोसोम हांगार आरो थरसे निला गाबनि लेपिस लाजुलि अन्थाइनि सावगारिफोरखौ नाय।)

थाखो 2: मोन्नाय गाबफोरखौ मोजाडै गुन्दै खालामनाय जायो आरो मैलाफोरखौ बोखारनो थाखाय सरनाय जायो।

थाखो 3: गुन्दैयाव मोनसे बाइन्डारखौ थि रुजुजखायै दाजाबदेरनाय जायो। जायनि सायाव बेफोर गाबखौ फुननाय जायो बैफोरनि बिखडाव नांथाबनायाव बेयो मदद खालामो। आरबिक आथा (बाबुल बिफांनि बिगुरनि रोसि), थाव, गायखेर, दावदैनि गुफुर आरो दावदैनि बिगुरा माखासे मिथिंगायारि बाइन्डार।

थाखो 4: थियारि खालामनाय गाबखौ आरिमुवारि खामानियाव बाहायनाय जायो।



मावफारि 4: मिथिंगायारि गाबफोरजों मोनसे आरिमु बानाय

थाखो 1: हानिफ्राय माखासे जिरादफोर आरो बिफां-लाइफांफोरनि फुखा बुथुम।

थाखो 2: गावनि फोरोंगिरि आरो लोगोफोरजों गाब थियारि खालामनाय खान्थिनि सायाव सावराय, आरो गाबफोरखौ जयै थियारि खालाम।

थाखो 3: थियारि खालामनाय गाबफोरनिफ्राय गुबुन गुबुन गाबनि गलायमोन्देरजों बिथांखि ला आरो आनजाद नाय।

थाखो 4: मोनसे गाबनि सोमोन्दै सान, जायखौ गावनि आरिमु खामानियाव बाहायनो हायो।

थाखो 5: मिथिंगायारि गाबफोरखौ बाहायनानै आरिमुखौ सोरजि।

बयबो गाव-गावनि आरिमु खामानिखौ फोजोबखांनायनि उनाव, थाखो खथायाव दिन्थिफुं। बाहायनाय जिरादफोरनि मोनसे आयदा मुं आरो गुवारै फोरमायथि होनानै गावनि आरिमुखौ लेबेल खालाम।

नोंथाडा गावनि माखासे थाखथियारि बोनाय सावगारि एबा आनजादफोरखौबो दिन्थिनो आरो फोसावनो हायो जाय नोंथांनि खामानिनि बिखान्थिखौ दिन्थियो। बयनिबो आरिमुवाव नुजानाय बिखान्थि आरो गाबफोरखौ सावराय।

गोजा गाब सायखंफोर



गोजा मोस्लेर गाब



मावफारि 5: मोस्लेर गाब आरो सायखं सोरजिनाय

गाबफोराबो जौनि गोसो थासारि बायदि सोलायो नामा ?
नौथाडा नोजोर होदों ना गोसोनि थासारिया सानसेमानि माबोरै
सोलायो ? गाबनि गोसो थासारिफोरखौ गोसोखांनानै आरो
बैफोरनि सोमोन्दै रायज्जायनायाव बा मिनिट सम हगार:

1. जेब्ला फरायसालिनि उनाव नवाव थाडो अब्ला नौथानि गोसो थासारिया मा ?
2. मोनानि जामुं जानायनि समाव नौथानि गोसो थासारिया मा ?
3. उन्दुनायनि सिगां नौथानि गोसो थासारिया मा ?
4. जेब्ला फुडाव सिखारो अब्ला नौथानि गोसो थासारिया मा ?
5. दा नौथानि गोसो थासारिया मा ?

गोसोनि थासारिफोर आरो मोन्दांथिफोरा माखासे समनि
थाखाय थायो आरो लासै-लासै सोलायो । बैफोर गोखों आरो
गोब्राब एबा गुरै मोन्दांथि होनो हागौ ।

गाबफोरबो बै बायदिनो । जों बैफोरखौ जिउगोनां, गोखों,
खोमसि, गोमो, सोरां, गुरै आरो बायदि बायदि खालामनो
हायो । सान ओंखारनाय एबा सान हाबनाय समाव अख्राडाव
माबोरै गाबफोरा सोलायो बेखौ साननानै नाय ।

सान्दुनि सोरां आरो गले-गले सुनायनि जाहोनाव नौथानि
जि-जोमनि गाबफोरा समजों लोगोसे गोमोरलानायखौ नुदों
नामा ? बैफोर गोजौनिफ्राय गाज्जि थासारि एबा गोसोमनिफ्राय
मोस्लेरसिम सोलायो ।



गाज्जि जिफोरखौ सिथाबनानै महर होनाय आरिमु

आरिमुवाव, गाबनि बैफोर बायदि रोखोमफोरखौनो
मोस्लेर आरो सायखं बुंनाय जायो । जों जायखिजाया
गाबाव गुफुर दाजाबदेरनानै मोस्लेर गाब सोरजियो । जों
जायखिजाया गाबाव गोसोम गाब लगायदेरनानै सायखं
गाब सोरजियो ।

गाब + गुफुर = मोस्लेर गाबफोर

गाब + गोसोम = सायखं गाबफोर



मोस्लेर गाब आरो सायखंफोर सोरजिनाय

फै जों हुदा खालामनि !

मुवा: आखिनो थाखाय सरासनसा लेखा बिलाइ आरो गाब (दैयारि गाब, पस्टर गाब एबा गुनदै गाब) - गोसोम, गुफुर आरो मोन्नै एबा मोन्थाम गुबुन गाब ।

गुबुन राहा: गोजाम खौरां बिलाइ एबा लाइसिफोरनिफ्राय गाबगोनां बिलाइफोर ला, आरो गांसे लेखा बिलाइनि बायदि रोखोमनि गलायमोन्देर गाब बानायनो थाखाय गुबुन गुबुन रोखोमनि मोस्लेर गाब आरो सायखंनि गाबफोर नागिर ।

मिथिंगानि गाब गलायग्रा फिसा फलि

माब्लाबा मिथिंगानि बायदि रोखोमनि गाबफोरखौ नायनानै सोमोनांदों नामा ?

बायजोआव ओंखारलां आरो गांथाम बिलाइफोरखौ नोजोर हो जाय गांथामबो बिलाइफोरा गुबुन-गुबुन सायखंफोर एबा गाबफोरनि जायो ।

नोंथाडा नुनाय खाथिसिन सायखंखौ मोननो थाखाय बायदि रोखोमनि गाबफोरखौ गलायनो नाजा ।

बारायहोनाय — मोस्लेर मानसावगारि आरो सायखं

हेफाजाब महूरै गावनि सोरजिनाय मोस्लेर गाबनि आरो सायखंफोरखौ बाहाय । गंसे रैखाथुमसालि वेबसाइट एबा सावगारि गोनां बिजाबफोरनिफ्राय आरिमुनि सावगारिफोर नागिर जेराव सावगारिफोराव रोखोमसे मोस्लेर गाब आरो सायखंफोर दं । नोजोर हो दि माबोरै मोस्लेर गाब एबा सायखंफोरा आरिमुनि थासारि आरो आबेगखौ बांहोदों । बे खामानिखौ मोनन्नैनिफ्राय मोनबा गुबुन-गुबुन गाबफोर आरो बेफोरनि मोस्लेर गाब आरो सायखंफोरजों गले गले खालामफिन । मोस्लेर गाबफोर आरो सायखंफोरजों मोनदांनाय गोसो थासारि आरो आबेगफोरनि सोमोन्दै नोंथाडा दोसे गुसु बेखेवथि लिरनानै दोन ।



मावफारि 6: आरिमुगिरिफोरजों बाहायजानाय बिखंफोर आरो मुवाफोर


नोंथाडा सोलोंबाय दि गाबफोरखौ मिथिंगानिफ्राय बानायनो हायो। लेखा बिलाइ दिहुननायनि सिगां, आरिमुगिरिफोरा मिथिंगायारि जिरादफोरनि बिखंफोर जैरे अन्थाइफोर, दन्दरफोरनि इन्जुरफोर, हानि प्लास्टार, ताल बिलाइ, दंफां आरो सिफोराव आखियोमोन।



बिसोर बायदि रोखोमनि थाम-महरारि मुवाफोर आरो मुसुखाफोरखौ दानो थाखाय टेराक'टा, अन्थाइ, जुनारनि हारा, सामब्रा, दंफां, धातु आरो खुन्दुफोरखौबो बाहायदोंमोन।

बिसोर जर'खा आइजेफोर दिहुनदोंमोन आरो मोनफ्रोमबो मुवा आरो बिखंडाव हाबा मावनो थाखाय आदबफोर जौगाहोदोंमोन।

जुदि नोंथांनाव लेखा बिलाइ गैयामोनब्ला, नोंथाडा गावनि आरिमुनि थाखाय बवे बिखं आरो मुवाफोरखौ सायख'गोन? गावनि आनजादफोरखौ गावनो खालाम आरो गावनि आरिमुखौ बानाय।

गाहायनि बिलाइयाव थानाय बिदिन्धिफोरखौ नाय। गोदो गोदायनि जारिमिनारि समनिफ्राय आरिमुगिरिफोरा बाहायनाय बायदि रोखोमनि मुवाफोर आरो बिखंफोरनि सोमोन्दै नोंथाडा सोलोंनो हागोन।







मावफारि 7: मिथिंगानिफ्राय मोननाय आंनि थुलुंगा

दानिया, नोंथाडा मिथिबाय दि आरिमुगिरिफोरा गावसोरनि सोरबिथिंखौ खाथिनिफ्राय मोजाडै नोजोर होयो आरो साबसिन गुदिखिथाफोरखौ हमदांनो हायो। साफ्रोम आरिमुगिरिफोरहा गाव-गावनि सानबोलावरि थायो आरो गावसोर बाहायनाय मुवा, आइजेंफोर आरो आदबफोराव गाव-गावनि सायख'नायफोर थायो। बेनो बिसोरनि खामानिखौ जुनिया खालामो।

सासे आरिमुगिरि बायदि, नोंथाडाबो गावनि सानबोलावरिखौ बाहायनो हायो। नोंथाडा ओरैबादि मुवा आरो आइजेंफोरखौ सायख'नो हायो जाय नोंथानि गावनि सान्दांथिफोरनि थाखाय आरजाथाव। मिथिंगाया नोंथानि थुलुंगा आरो नोंथाडा सोरजिगिरि। नोंथानि गावनि मोनदांथिफोर आरो नोजोरफोरखौ सोफादेर।

बेयो हाजोमा एबा दैमा, एबा सान जानो नाडा। नोंथाडा थि खालामदि नोंथानि थाखाय मिथिंगाया मा दिन्थियो। बेयो नोंथानि खाथिखालानि सोरगिदिनिफ्राय जोबोद खाथिसिन जानो हागौ। गोसोआव लाखि सावगारिया नोंथानि मेगननि नोजोरजों जानांगौ!

